


1113



漳州府

在省城南七百里

領縣十

釋文從水從章其義以水之清濁相雜而有章也
郡治初建在漳浦梁山之下溪水自西林而出海
水自銅山海門而入清濁合流故以漳名其始荒
頓人稀不霑王化無諸之裔境也迨唐高宗儀鳳
三年諸蠻侵軼潮州翊府左郎將陳元光討平之
開屯于漳水之北且畊且守武后垂拱二年元光
請建州于泉潮間以抗嶺表詔從之即屯所為州
地名雲霄其南漳水出焉所謂漳水當即今之雲
霄溪也郡人丁氏家藏殘記謂古漳州治盤陀之

陰盤院即梁山西嶺至開元四年徙州治於李灣川今漳浦縣治貞元二年觀察使盧基錄前刺史柳少安疏上之朝遂移今所○宋彭乘墨客揮犀云漳州地連潮陽素多象往往十數為群然不為害惟獨象遇之逐人蹂踐至肉骨糜碎乃去按郡志物產無象蓋自宋以後民生日繁鳥獸避跡又淳熙初趙公綱為守聽郡民設機穿以斃象禁齒牙不得輸官于是民率用命其種遂絕○方輿勝覽宋熙寧九年大饑郡倅柯述賑救得法全活人民無筭有二鵲樓樓其廳事比述去鵲亦送之後因

名其堂曰異鵲蘇軾為賦詩云柯侯古循吏悃悃真無華臨漳所全活數等江中沙仁心格異族兩鵲棲其衙善惡以類應古語良非誇君看彼酷吏所至號鬼車○輿地紀勝君子亭在府治後始于朱夫子仲晦名以復軒軒之後為月臺臺後為隱室其象圓以茅覆之後郡守趙汝璫即舊址為亭扁曰君子亭○喜雨亭在治東南隅俯瞰大溪群山環拱舊水雲館之地宋郡守傅伯成建此亭于館後○亦佳亭宋嘉定郡倅黃之傳建有詩云小亭新築亦佳哉花木無多手自栽若謂甘棠安敢

比清陰留與後人來○志云秋江亭在城南隅元
呂養浩建俯龍溪水額曰秋江楊志行記○梅雪
齋在郡城內元林弼建以為讀書之所○唐張翊
逢漳州崔使君北歸詩在郡多殊稱無人不望回
離城携客去度嶺擔猿來幃寫終冬葉瓶緘落曙
梅長安有歸宅歸見鎖青苔○陳陶贈漳州張怡
使君詩舊德徐方天下聞當年熊軾繼清芬井田
異政光蠻竹符節深恩隔瘴雲已見嘉祥生北戶
常嫌夷貊蠹南薰幾時徵拜征西越學
使君○文獻通攷清漳新志十卷宋嘉

叅軍方杰撰太守趙汝說蹈中序○國朝陳思賢
茂名人為漳州府學教授文皇靖難詔至思賢
放聲大哭曰明倫之義正在於今日矣遂堅固不
出迎率其徒伍性原陳應宗林珏鄒君默曾廷瑞
呂賢等即明倫堂為舊君哭臨如禮郡人執送京
師思賢暨六生成以身殉殉或云死于道嘉靖間
提學副使邵銳立祠祀之○天順二年漳州布衣
陳真晟詣闕上程朱正學纂要不報真晟字剩夫
布衣其自號也復以科舉為事務修聖賢踐履之
學得力于主敬居多至是效伊川故事詣闕上書

漳州府志 卷之六
不報歸家尋卒○天啓甲子科鄉試漳州中式生員顏茂猷首场四書三篇而外五經各四題猷俱撰完共二十三篇用雙行寫千卷時填錄所官以違式為請監試察院喬公憐其積學特命錄其本經以進是科中十八名弟茂行亦全舉持用一經云○先洪武初年學士王禕出為漳州府通判公在任日以五經訓解與多士課習至今傳其遺風未泯也忠文建言立國之初宜存忠厚省刑薄斂以綏輯人心為本 上嘉納之次年修元史召還同學士宋濂充纂修官

龍溪縣 附郭

輿地志云龍溪縣梁置隋開皇二十二年併蘭水綏安二縣入焉今綏安溪在漳浦縣南八都而蘭水故縣莫知其處郡志云或即府城之南溪也其源有二北出永豐永溪南出銅壺小溪至南靖合流遶郡城南東過文山而滙于北溪北溪即龍溪也亦名九龍江源出延汀之界合寧洋龍巖漳平諸水而下華峰又合長泰諸水過香洲渡歷峽中出峽為柳營江與南溪會流入于海梁大同間以九龍遊戲江水故名宋大中祥符七年邑民網魚

見有神龜負珠出游因捕得之其珠圍濶三寸七分光采燭天郡守危稹因改貢珠門為還珠門淳熙初陳淳字安卿家于北溪學者稱為北溪先生○漫潭在九龍江上游江水自華峰而來注九龍山下兩山如壁流十餘里漫而不湍淵而不測梁時龍躍即其處舊有寺唐呂溫送僧詩云幾夏京城住今朝獨遠歸脩行四分律護淨七條衣溪寺黃橙熟沙田紫芋肥九龍潭上路同去客應稀○潭之上游為天宮溪其上有天宮山溪中有石滌高丈餘傾瀉入潭發泡有聲水大則聲細水小則聲洪夜聞如更鼓名曰更鼓水○柳營江在漫溪之南舊志云唐末王潮下泉福嘗駐輜重宿重兵以守之故有柳營之號按白石丁氏古譜云六朝以來戍閩者屯兵于龍溪阻江為界插柳為營江當海溪之交兩山夾峙波濤激湧西岸盡屬蠻獠唐總章間諸衛將軍陳政戍閩政沒子元光代領其衆陰遣人沿溪而北就上流緩處結筏連波從間道襲擊之遂建寨柳江之西以為進取恩威並濟士黎歸附因轄其地為唐化里宋紹熙間郡守趙伯暹始作浮梁以度嘉定七年太守莊夏易以

板橋豐石為址醜為十五道而屋之名通濟橋嘉
熙元年圯于火太守李韶易梁以石而不屋越四
年乃成長三千尺址高八尺醜水亦十五道梁之
跨於趾者五十有八長八十尺廣博皆六尺明晉
江陳讓記云漳南橋梁虎渡第一昔欲為橋有虎
負子渡江息于中流探之有石如阜循其脉沈石
絕江隱然魚梁乃因壘趾為橋故名虎渡○志云
紫芝山在城西北隅唐貞元間移漳浦開元寺於
山麓寺內有滿月池昔人建亭其側種松百株號
曰松關咸通四年遊奕將王剗造塔于此宣義郎

劉鏞書佛頂尊勝陀羅尼經于塔上書法道勁漳
南金石刻文此為之冠○開元寺西舊有齊雲閣
宋時判軍州事蔡襄嘗來游詩云紫閣青梯壓翠
岑春情秋思共登臨雨嵐供眼橫千掌星漢垂簷
直半尋忍別朱欄真俗吏獨棲蒼樹祇仙禽當年
人事多奇尚擬托巖扃息寸心○隆壽山在紫芝
山左保福山在紫芝山右五代梁建有保福寺及
柴周建有隆壽院故以名山保福寺淨象院內有
月淵亭郭功父詩仰攀明月輪俯瞰滄海淵乾坤
惜形勢此地何其偏靈溪九龍躍仙山一峯圓邂

近攝邦守所樂多林泉宋紹興間知梅州楊承祖以祠祿歸卜別墅介于保福隆壽兩山之間與同志倡和為真率集承祖有詩云乘興登臨捨杖藤危巔未已覺身輕新開竹徑從風入小坐松岡待月生江上數峰攢壁立林間一閣礙雲行凭欄朗誦昌黎句寸碧雙增遠目明口清豁禪師住保福將入芋溪待滅遺偈于橋上曰世人休說路行難鳥道羊腸咫尺間珍重芋溪溪上水汝歸東海我歸山○紫芝之西麓為日華峰旭日初生此峰先得其光故名唐貞元十七年移漳浦縣祀老子開元觀于此宋大中祥符元年改名天慶觀古老相傳漳南水土不佳仕宦初至者飲之輒病惟天慶觀一井可辟瘴癘味復甘美仕宦將至土人汲此泉數罍馳往迓之又城外西湖有泉亦稱甘美可辟瘴癘今已湮○龍亭山在城西南隅平地突起奇石攢湊俯瞰溪流相傳嘗有龍騰于溪因築亭溪上故名宋蔡襄詩要看紅日照龍臺白玉堂高錦幃開樹色一番經雨活溪光幾曲抱山來雲歸深洞天形瘦風落前村遂弄哀擬結青樓遍題咏思王何吝斗量才○高亭山與龍亭對峙而差小

偽閩龍啟二年建威惠廟以祀唐陳元光(宋呂琦題威惠廟詩)當年平寇立殊勳時不旌賢事弗聞唐史無人脩列傳漳江有廟祀將軍亂營夜雜陰兵火殺氣朝叅古徑雲靈貺賽祈多響應居民行客日紛紛○丹霞山在城南里許土木皆赤每晨夕日照望若丹霞故名下有南山寺又名南山(宋林廣發詩)翹首城南上悠然見此山竹藏秋雨暗松度晚風寒佳色催黃菊晴光上翠巒巒飛何處鳥日暮盡知還○又五里為南巖山上多怪石形如獅子又名石獅巖然亦有若蟾蜍者及為梯為門之屬不一其下清泉一泓名白鹿泉巖傍為佛菴昔無隱禪師居之畜虎隨使俗名虎磴巖巖前有虎拜石相傳無隱所畜虎禮拜於此巖之南有蝙蝠洞洞口有萬石室普陀巖下折為玉泉巖有泉出石下色如玄玉故名(宋李彌遜石獅巖詩)翠合峰巒萬葉稠雲擎佛宇出巖幽秋光不到庭陰樹曉日先明竹外樓戶牖高低分世界川原遠近失汀洲湯休示我真消息更在靈山最上頭○又五里為天城山唐邑人周匡物與潘存實讀書于此有自隱堂(匡物詩云)窗外捲簾侵碧落檻前敲

竹響青冥黃昏不欲留人住雲起風生龍虎醒又有古鏡歌云軒轅鑄鏡誰將去曾被良工瀉金取
明月中心桂不生輕冰面上菱初吐蛟龍久無雷
雨聲鸞鳳空踏莓苔舞欲向高堂對曉開不知誰
是孤光主時宰王播見而異之元和十一年播舉
匡物進士及第為漳登進士之始十三年存實亦
登進士憲宗勅改為名第山劉禹錫名第山詩危
亭誰結據山椒名第三人不可招繞閣溪山敞圖
畫萬家樓閣插雲霄○又二十里為九龍嶺兩山
夾峙中縈石磴凡十里許路通潮州嶺下有木綿

菴宋鄭虎臣誅賈似道于此初似道在朝時有術
者言平章不利姓鄭人每遇朝士有鄭姓者輒困
抑之武學生鄭虎臣登科乃以罪竄後因赦得還
似道謫循州虎臣押往凌辱百端至此病篤虎臣
鉗之而絕元湯益吊賈似道詩檀板敲殘月上花
過墻荆棘刺簷牙指麾已失鐵如意賜予寧存玉
辟邪破屋春歸無主燕荒池雨產在官蛙木綿菴
外尤愁絕月黑夜深聞鬼車○文山在城東二十
里北臨大溪三面通湖國朝弘治十七年四月
山有大楓樹上產異花一簇其狀如蘭其葉如桂

有殊香凡四十日方謝○鶴鳴山在文山之北一名石壁山其北而岐者為岐山正德志云岐山在北鶴鳴山在南一山岐而為二故曰岐山隋開皇時有潜翁修煉山巖養白蝦蟇及鶴自隨鶴時鳴於山巔故曰鶴鳴山今山中有潜翁巖乃其所居也又有謙師巖者宋時開元寺白衣僧從謙嘗游此山見二貧士對奕就之化為二鶴冲天而去餘一碁子取而咽之因而辟穀不食乃坎石為室居四十年後郡人劉植建仙亭于其處遂名仙亭巖有題詩石一石覆之其文漫滅可識者保大與許碁尋偃月九字而已按許碁自稱高陽人由荆襄抵江淮武夷霍童無不遍歷到處皆于石崖人不能及處題云許碁自峨嵋山尋偃月子到此此其一云口石禪床乃鑿石而成五代時僧楚熙居此陳洪進月給其廩糧口誦經壇有石斜疊其色如銀擊之有聲口虛白巖上覆全石下窈而平日華照之洞然虛白故名中有石穴深不盈尺而泉清冽僅可供一人名一人泉口千人洞其上有石曰掛練石洞口狹暗其中寬肆足容千人口石室巖巨石如室廓然平朗正統初僧絕塵者脩行於此

因作樓巖前剝竹引水入厨竹節忽生笋成叢因名瑞竹巖○雲洞在鶴鳴山之陰明翰林學士豐熙記畧云洞麓兩巨石夾起如觀逶迤陟磴上石益巨大刻雲洞者二行數百步入石門中書室三楹峭壁刻朱晦翁書溪山第一余題曰霞窩左洞橫廣數椽懸石如倒鐘者如蓋者如蓮房者左右皆通天南豁咫尺東壁下泉出甚冽又東入石門得洞三穿石起門外若樹塞者西嚮曰玄巖北洞有井竈故迹相傳昔異僧居之南洞合兩石窿起若中雷名觀瀾牖外盤石鑿曲鉤引泉以西架渠穿石罅至霞窩甃石池貯之南下磴危峻漸移而下東得平石廣方數丈曰鳳臺上視峰頂崛起參天曰天柱又下三笋卓立曰台屏又下一洞稍廣平蓋外刻晦翁書石室清隱四字有泉可傳觴厯雲依巖稍上石益密且巨有洞可容千人厯洞右磴上百步得堂俯視霞窩峭壁如圭植于前右上有巨石面方廣三尋許架絕壑曰仙梁回陟至二石並立若朋字行穿一洞轉而南視後直霞窩北轉近巔一峰獨聳即天柱也稍北一石虛出絕崖撼之即動剛風亦然題曰風動正德志云山頂有

風動石高五丈圍一十八丈下有大石盤閣之此石四面均不偏倚其下適兩尖相當故風來則動〔宋胡梅題仙亭巖詩〕仙子高樓海上山一塵不到石臺間鶴隨仙客收棊去龍伴山僧採藥還風送白雲歸洞口鍾隨明月到人間不須再問神仙事花落花開暑又寒○華封嶺在城北華封社亦名龍頭嶺高千餘丈累磴鑿石以梯行人北溪之流經其下灘瀨麤惡怪石巉巖有三磴二花之名舟楫不通上下皆當逾嶺溪傍有石狀如龍頭故名〔宋楊汝南夜宿龍頭詩〕江流如箭路如梯夜泊龍頭烟靄迷兩角孤雲天一握曉光那覺玉繩低○又二十里為九龍山其山北有九龍水又有金溪水唐書輿地志云龍谿隋縣有九龍山宋陳堯佐詩云人生五馬貴山有九龍游是也○又十里為坂尾山明陳真晟定居其下改名定山真晟鎮海衛人以布衣自號嘗赴省試聞有司防察過嚴無待士禮乃辭歸自是不復以科舉為事專志學問布衣生于鎮海遷于龍巖晚乃定居于玉洲即此山也○又五里為白石山山多白石故名亦名鶴石山有巨人跡指有石磴可容千人以為聚元邑

人陳元善自蓬洲遷居於此至正二十七年海壩
逃兵作亂執元善及其妻孥欲脅之以為民望元
善不從罵曰吾所畏者天不畏者死汝賊豈能久
生耶賊怒殺之妻郭氏子光遠光迪皆不屈而死
○圓山在城西南十里前後望有十二面故名唐
時有中丞黃碣每朝退見有賣藥于市者舉止非
常揖而問焉曰姓康居清漳圓山之下琵琶坂後
碣轉運安南過漳訪其所在咸曰山已在目康之
家不知也碣驅馬造其下視一祠神像宛如長安
所見公始驚悟後碣典郡欲移祠山椒一夜防城
使陳僚夢神身着羽衣手提綵箋授以詩曰賣藥
因循未得還却因耽酒到人間有心只戀琵琶坂
無意更登山上山宋熙寧七年封通應侯宣和四
年勅賜昭仁廟宋郭正祥圓山詩縹緲臨諸峰幔
卷濃雲開秀特不可掩擎天碧崔嵬僧寶玄題仙
祠南望青山十里賒五雲深處問琵琶從知天子
封侯廟原是神仙賣藥家明林唐臣詩山宮曾記
夢朱衣十二圓山紫翠迷一片濕雲初過雨半篙
新漲已平溪笙歌彩鳳空中下劍化群龍匣底嘶
何日神丹成九轉從公來聽枕中雞○天寶山在

城西三十里山有五峰峭列周圍百餘里郡之望山也上有寶巖洞芙蓉城百丈泉諸勝九龍江之珠即從此山飛入云○枕天寶之西者為新嶺石磴盤迴十餘里路通安溪龍巖漳平三縣舊設亭障于上又西為揭鴻嶺輿地志云即古葵岡嶺東南之揭二越之基也漢唐時西北向長安故道山安溪大田而行今道廢其下有唐屯軍營故址上有營頭亭唐慕容韋度揭鴻嶺詩閩越曾為塞將軍舊置營我歌胡感慨西北望神京歐陽詹宿營頭亭曰峰疊嶂繞亭隅數點烟霞勝畫圖日暮華軒卷長箔太清雲上對蓬壺

漳浦縣

在府治南一百二十里

攷三國吳永安三年析建安校鄉西偏置綏安縣屬建州即今地也潮陽志云綏安晉時屬義安郡即今潮州界為雲霄地廣東通志云大埔縣西北百二十里曰高昌山其下有綏安溪南越志云綏安縣北有連山昔越王建德伐木為舡其大千石以童男女三千人舉之既而人船俱墜于潭時聞拊舡有唱喚督進之聲往往有青牛馳而與舡俱見一名越王潭輿地廣記云唐垂拱二年置縣按

武氏垂拱二年即中宗嗣聖三年與州並置者初在梁山之下地名雲霄其南漳水出焉因名漳浦開元四年州民余共訥等以地多瘴請徙李鴻川即今縣治也原屬郭下貞元二年徙州治于龍溪始為支縣○按李鴻川其源有三一自平和五寨一自南靖龍巖崎溪一自盤陀巖九曲溪匯流于此川傍有李姓者居之故名今亦曰南溪○綏安溪在縣南八都東流合李澳川入海古綏安縣治也〔六朝〕宋沈懷遠次綏安詩〔負〕豐忝良時寬恩荷明牧叨乘使者傳來接荒人獄閩方信阻狹茲地

亦豐沃蒼山繚萬尋漲海涵千谷高秋桂尚榮隆冬泉更燠在昔漢世宗開疆窮所欲餘善既辭師建德仍伐木番禹竟灰燼冶南亦淪覆至今遺父老能為古風俗陰崖猿晝嘯陽畝杭先熟穉子練葛衣樵人薜荔屋矜爾為生微誨予從不辱〔陳〕顧野王送人之綏安詩〔谷〕風揚暖律扶旭開餘靄蘭芽被平臯氷漸泮微瀨悟彼芳歲新愜此賞心會絲竹邯鄲娼朋游鄴中蓋貢橘偉含滋仙緇妙飛繪峻嶒眺廣嶽浩漭窮溟海衆賓悅禮遇遠俗懷仙愛操翰本非工無譏比曹鄴○印石山在縣東

門外高可二丈四面端平如印傍有石壁刻呂令
峰傳公河六大字呂名璫惠卿之父也○縣西北
里許為好景山縣治枕其麓山巔有石如虎亦名
虎山距縣二十里曰摩頂山為西北諸山之宗山
高而圓潔其上平坦如佛頂由此東行南折為後
到山山左為白鶴嶺其背曰龜山肩曰羅山（明邑
簿陳致中題白鶴嶺詩）石竇寒泉響玉徽閔雲出
岫繞松扉一從白鶴高飛去棲壁亭空鎖翠微○
梁山亦稱梁岳在縣西南三十里高千仞盤亘百
里有九十九峰古記云梁岳閩中之望也方輿勝

覽云梁山秀麗而崇圓故又稱圓山名山記云峯
十有二唐鍾紹京改峰名二十有四曰蓮花曰獅
子曰金剛曰力士曰雙髻曰長劍曰七星曰八柱
曰觀日曰臨海曰晉亭曰青閣曰雙鳳曰玉乳曰
錦石曰月桂曰壽星曰紫雲曰金雞曰丹竈曰香
鑪餘失其名而長源溪錦溪萬傾溪仙溪盛溪錦
石溪垂玉溪龍潭溪出焉故（唐明偉詩云）梁山重
回首翠峰三十六也山東南盤石上有穴屈折上
穿如井水泉湧出大旱不竭謂之靈泉山南麓各
有湯泉其中峯曰蓮花峯相傳為齊武帝所賞亦

名齊帝石按南齊書武帝嘗為贛令晉安王子勛反遂舉義兵以衆寡不敵避屯揭陽山中揭陽本漢縣南齊時屬義安郡于時漳浦未建懷恩未割則梁山固揭陽境此山為齊武帝所臨眺不誣也口晉亭峰在齊帝石之西晉葛洪嘗居之唐張登詩孤高齊帝石瀟洒晉亭峯即此開元十三年十一月是山自朔旦出祥雲如天仙佛像麟鳳花草之類彌亘百里竟月方息邑人潘存實初與周匡物讀書名第山後乃脩業於此宋奉議郎吳與書室亦在焉與邑人登元豐五年進士即撰圖經者

陳振孫曰吳與家藏文籍未經兵火故多完具鄭樵曰古之書籍有唐宋並無今出于漳州之吳氏可權其博洽可知口水晶坪在梁山之上以其地產水晶故名又上有瀑布泉宋蔡希遠詩會稽之南羅浮北中有大羅神仙宅瀑流千尺掛長虹瀉下銀河數千尺口盤陀嶺在梁山之西叢薄崎峻盤桓可十里癸酉志云即宋葵崗漢南越蒲葵闕也按漢書元鼎五年漢擊南越東越王餘善以兵從至揭陽以海風波為解及漢破番禺遂還擊之于此舊設漳浦驛在焉唐大中十二載嶺南節度

使揚發途次漳浦寓止驛樓聞有李德裕留題尋訪久之乃得本于士人家其詩云嵩少心期杳莫攀好山聊復一開顏明朝便是南荒路更上層樓望故關發和之云南盡封陞見好山蒼蒼松桂顛商顏誰憐後夜相思處白草黃茆舊漢關今關在驛西南一舍嶺上舊多猛象為患宋有頭陀吳祖華聚徒建菴於嶺下民居既稠象跡遂絕因名無象菴○又四十里即雲霄山以其地高聳雲漢故名癸酉志云俗呼大臣山通志作大神山縣志云將軍山在雲霄城西與大臣山隔溪列峙唐戍將

陳元光征蠻居此故名今為雲霄鎮淳祐志云古閨媛能詩者則有雲霄李氏嘗作汲水詩云汲水佳人立曉風青絲輾盡轆轤空銀瓶觸破殘粧影零亂桃花滿井紅又書懷云門對雲霄碧玉流數聲漁笛一江秋衡陽鴈斷楚天濶幾度潮來問過舟○將軍山通志云陳元光築城居之故名宋祥符圖經引蔡如松辯以為古閩越王號力騶等為吞漢將軍使之南據險要以拒漢即此初非以元光得名也按本傳元光父政為諸衛將軍戍閩元光從馬父歿代領其衆葬父于雲霄山故此山至

今有陳王墓或者山名不因元光而元光葬其父則山因之益顯耳○將軍嶼在縣東南大海中磐石疊聳舟舶不通濱海者多乘桴以取蠟相傳陳元光駐兵于其上故名海中島嶼隱見不常所可指者有魚腸嶼竹嶼石城嶼菜嶼大桑小桑大澈小澈諸處 國朝嘉靖九年正月海中山峰並列忽沒不見頃之三山併為一峰屹立騰空作樓臺巍煥之狀如是者凡三日蓋蜃見云○良山在縣東南十五里與梁山對峙而此居東高數百丈東峯距海西接南詔潮陽之地唐賢良潘存實亦嘗

修業於此故山以良名○又三十里為鼓雷山斷崖千尺下瞰大江每潮至怒濤急浪其聲如鼓雷故名○海雲山在縣東二十里山頂沃田清泉雖旱不涸山半有海雲巖又有紫薇石洞其石磷竒如列笏竒獸之狀相傳有閩王宮人學仙於此明黎應物詩巖扉高敞海雲巔此地王姬舊度仙石磴香塵飛玉屑粧臺枯蘚印金鈿帳空鶴怨餘千載花落鶯啼別一天絕頂靈龜如可問卜居終日濯甘泉○又三十里為竈山疊障高大周環四十餘里其上多怪石有丹竈仙跡故名多產石蘭及

黃精山陽有田數十畝可耕○大帽山在縣東北
八十里山大而峻其上有玉川瀑布新村石鼓龍
湫潭寶珠石諸勝又有天湖悟道普陀金仙碧石
龍雲石獅弘道八巖逾北行則為海澄東北行則
為鎮海○又二十里為太武山一名太母山壇記
云閩中未有生人時夫人拓土以居故名山高千
仞周迴亘百餘里屹立海上端重聳峭其南五里
則鎮海衛設馬東望大海汪洋無際陟其巔漳泉
二郡盡在目昔好事者列為二十四境曰延壽
塔棲雲樓安樂窩錦亭峰石鐘樓澗谷橋浴仙盆
雲根洞九霄巖石眼泉烟霞石彌陀石香鑪石湮
槃石棋盤石馬蹄石百丈石獅子踪仙人跡仙竈
石門石屏龍潭象徑又有小石城相傳越王建德
避秦兵于此蔡如松十辯云按史記越王勾踐至
無疆七世無名建德者惟漢元鼎中南越相呂嘉
反立述陽侯建德為王城守番禺後人誤指為越
王是蓋謂建德在南越不在東越其城守在番禺
不在閩或曰按元鼎五年將軍路博德等擊南越
南越王建德與其相呂嘉夜亡入海當此之時飄
蕩入閩理固有之但淳祐志稱秦討建德斯誤矣

〔明學士豐熙詩〕一山高出萬山巔絕頂相傳舊有
仙朱草紫芝雲外地碧桃紅杏洞中天石盤棊散
留殘子藥竈丹成起斷烟借問王喬真甲子尋常
七日是千年

龍巖縣 在府治西北三百一十里

晉武帝平吳分置晉安郡領縣八新羅其一此乃
新羅地之苦草鎮也原屬汀州唐天寶元年改為
龍巖縣大曆十二年始隸漳州○按龍巖在城東
翠屏山之麓前後有二石峰石趾有大小二洞虛
中如室石壁有雙龍紋內可坐百人洞口有桃樹

二株不根土壤對峙石壁上高不及三尺歲結碧
桃數十顆〔明邑人春坊王源記畧云渡龍津東行
四里許有黑石尖峰峭削列鎮山下居屏風山麓
者嵌巖面北一大石洞邃若堂奧頂底寬平可坐
二百餘人洞頂青白小龍紋紛然不可數計壁右
湧出一條如柱黃色鱗甲若真龍頭角足手不露
至頂而止左一條青色附壁而上蜿蜒緣頂至簷
頭角鱗鬣宛然口頰間有竅滴水錯落如珠洞前
躡級而上石結上臺植以花木大洞左一小石洞
前後有罅歎仄以入若畫舫齋濶僅一丈長如濶

之五頂上小白龍紋簇簇小洞左緣磴穿峽而上至紫薇閣有石狻猊舞躍俛伏宛若生成前有磐石上夷可坐十餘人巖之上怪石駢列不可名狀○龍川受汀州上杭古田諸溪水合大小池歷龍門磴至縣西會羅筋諸溪環繞城南而東到鴈石舊志所謂東溪即此一明王源詩湛湛長江水發源何逶迤遙遙出龍門逝者長如斯清風拂晴曙寶月含光輝水月共澄澈浩渺同心期○小溪源出龍門里茶峒其流清淺湍急縈迴而趨縣治入于龍川其地幽勝比之武陵宋元祐間里人陳備劉

棠以詞賦齊名時人稱曰劉棠陳備漳南賦虎劉既登科陳遂隱居於此嘗賦詩云大不手持卿相印小無人擁使君符門前溪水綠於染好把一竿秋釣鱸○覆釜山在縣治後邑之主山也自城北特起圓岡形如覆釜故名其在留暉門內者為大對山一名官砦山有宋令趙公城遺址在迎薰門內者為清高山積石竒怪勢高氣清故名又有黃巖山在拱極門內梅亭山在清高山之右○烏石山在縣西南二里許上有小石室南麓有巨石峙道傍曰烏石頭宋時邑人陳氏子少飯牛而牛孳

息佯狂不事家人產辟穀於此不知所終或曰尸
解而去○東寶山在縣東五里山麓產銀鉛每風
雨時現寶光左巔有龍井洞其門旋折如牛角內
寬丈許六月有水凝如珠○紫金山在縣西十里
五峰秀削壁立千仞旭日含輝土石皆紫故名上
有天然沼泉出石罅注而為池魚游其中歷歷可
數下有赤水巖(明徐拱辰詩)氣勢何崢嶸象峰獻
丹碧朶朶金芙蓉玉井何年植上有仙人居明滅
望無極匪惟世人傳猶有古時跡玄冬雪初霽一
眺瑤瑤積寒光與晴暉遙遙相盪射居人占豐年

此瑞良所惜○奇邁山在縣南二十里一名九峯
岐嵯峨拱峙森如列戟(明陳良詩)奇邁層峯表晴
嵐盡日籠陰崖浮薄翠陽石映輕紅鳥度屏風裏
人行圖畫中深潛有文彩五色耀長虹○石鐘巖
在縣西四十里(明知縣吳守忠記畧云)自獅子巖
西山行十數里涉澗而比忽石崖壁立數十百丈
稍右一石山秀削端巖則巖在焉至巖前亂流而
西登崖則下巖巖際石乳駢垂最長者離地僅尺
許地中石依附上聳圓秀如鼓稍前路漸折而南
至巖扉狀若倚蓋左高右下右額石紋攢蹙多幢

幡纓絡之形稍入作大士騎象形巖高可三丈橫
倍之深又倍之若一厦而三級前級最深廣巖右
石垣迴合二級左右石腳插入巖中伏環如象昂
起如獅中級砥平可席東壁上有石室秉炬入觀
石柱上下連續柱上玲瓏刻畫如浮屠後一級遙
望東壁石影若壯士橫肩距石奮怒右壁下石柱
剔透如鰲足出巖前數步仰見上巖石乳所結如
觀音座者數處至上巖門稍狹地如雲母石數步
內昏黑得火乃行梯而登石窪處分三節內如蓮
花心有無根水外二節駢蹙有文如蓮瓣受梯垂
石上卷似蓮葉循此西有石倒懸又如未舒菡萏
自此四維上下皆石乳玲瓏穿虛或乘空下垂或
從地突起兀世所有之象無一缺者火光所燭通
透瑩徹隨折脆斷為白石巖又南一洞深不可測
有人繫繩于腰把火深入聞水聲乃出引繩得五
十丈稍西巖愈深愈暗倍用炬火從以鼓吹前數
步左壁上怪石林立如帷中羅漢雲際如來列坐
禪榻又有石自壁下斜出洞中若龍背負諸妙相
前數步有光若星望之乃巖頂石穴透天也登二
十步外有三卧石直達穴口旁縮中隆底平潤若

鐘巖之得名以此○九侯山在縣北三十里高入雲漢廣袤數十里九峰列峙尊若公侯故名或云峰列如猴故通志曰九侯山前志又謂之筋山正德志云其山支麓盤踞于地如人身有筋故名又云唐武德元年有惡少相聚于允義侯廟謀為盜俄而霹靂大震群盜手足筋脉皆攣縮吳與圖經序筋山屏盜是也宋邑之表政里人郭公者少嘗游此遇異人授以遁形變幻之術每有寇輒出奇立功歿且神異鄉人祀之于銅鉢城○又二十里為天官山上有瀑泉飛瀉數十丈圖經云常有雲氣覆之陰晦時或聞簫鼓聲

長泰縣在縣東四十里

隋時南安縣有鄉曰武德唐乾符三年邑令張思進始以其地置武德場南唐保大元年陞為縣改名長泰宋盧琦贈長泰尹余良甫詩令尹余良甫應勞撫字心野人爭賣劍山縣但聞琴夏半畬田熟秋深瘴霧沈儻懷鐔水客千里寄知音○志云良岡山在縣西北五十里縣之主山也上有龍鬚泉涌流不竭瀑布出焉山脊有翁婆石高數丈隔崖懸峙石頂有磐石大可四畝餘上有廟廟前有

三磁鑪其中貯錢人多祈貸有應則以息錢還之
祈者接踵自此逶迤入縣治圓峯特起而縣治枕
其門曰羅侯山○天柱巖在縣東五十里山有屏
風石高九丈濶五丈宋崇寧時梯空鑿天柱巖三
大字是時龍溪有楊處誠自幼慕道初于天寶巖
夜坐見東北有天燈雲旗之異遂經古溪吳峰至
此有犬隨行蛇繞地若覓寺址者乃即地為菴鍊
氣闕形莫知所之是山多石石所會處為一區大
抵平者為巖凹者為洞又或下洞而頂即巖入山
有石當道鑿為梯以度又過一石若有門可入稍

進為洞洞前後兩重其中若天井過此而徑愈窄
有石如象名象徑象膜于地相連一石平如砥砥
石之下有徑長以里計巖洞泉石相屬其前門即
未到一線泉時所見石後乃百丈屏徑中之有聲
稱者曰迷樵路觀海洞劍脊橋暗谷石屏屏曰百
丈可數十丈洞兩層高亦相當其首皆下覆半徑
不見日在洞中反見日由此可達洞頂而屏亦盤
旋可到頂出屏之路是登燭峯峯首銳石稜如皸
為此山小頂由麓而升若磨磐然東往絕頂南往
瀑布俱以是麓分下之為石屏舊路橫北而往即

盤陀行者必斜繞之徑一洞洞能四達尤異于他洞陀之上為石室可容百人自此至烏巖與絕頂俱五里東西而馳將至巖有洞洞敞甚水注有聲洞稍下為石是臨絕壑緣石以上望巖若榜其色純黎徑升巖有三層俱可容數十人然必自背以至頂巖頂為西比最高絕頂可以觀日初出直下為瀑布與白雲峽對處其路循山之趾而半側于坑白雲坑中石也岌業如豎刀雲自此起故名瀑布之石其色如燒而水徑焉壁則懸壑則渟當其亂處則間匿而出○吳田山即吳峰也一名曷山

山少樹木其高處有田數十頃山之左為蜈蚣山郡志云昔有沈部公者名彬嘗自指葬穴以示家人後開墳見有漆燈以石為臺中有銅牌篆文云佳城今已開雖開不葬埋漆燈猶未滅留待沈彬來然潤州吉州亦俱載之○董奉山在縣北五十里形如卓筆上有丹竈棊盤琴室淳佑志以為神仙董奉所游(縣令韓常卿詩)丹竈棊枰去不收未知踪跡為誰留烟霞空掃樵人徑松檜重陰古寺樓怪木化龍雷雨後碧波涵月鏡潭秋遼東望斷無歸鶴山自嵯峨水自流○又稍東為鼓鳴山山

下有洞圖經云風雨晦冥則聞鼓聲唐元和間禱雨有驗勅號鼓鳴山封山神為威澤王志云合良岡董奉鼓鳴吳田天柱是為五名山

南靖縣在府西北四十里

元至元中割龍溪漳浦龍巖三縣邊鄙置南勝縣其舊址一在縣西瑄山之陽一在縣西南礮山之東至正十六年徙于雙溪改名南靖以邑當閩境之南取安靖為義○按雙溪在縣治前大溪源出清寧里小溪源出永豐里龍巖縣界至此合流東至峽口西渡為府城南門溪入海又縣西之梅子

潭縣北之峰蒼澗水皆注焉○鏡山在縣西北五里夕陽返照炫然有光故名毗連有寶珠山形圓如珠夾于鏡山磨石之間下有溪流迴繞兩峰壁立一港如門即梅子潭之水接深渡溪處也○湖山在雙溪之南山下有湖水故名○翠微山在縣西南草木蒼翳遠望之如翠微然○峯蒼嶺在縣北十六里以峰高入雲四時蒼翠縣治之歐寮山發脉于此亦峰蒼水所出也又遠百餘里為浮山與龍巖界其山當路形如覆鐘與上下山不相連勢若浮來故名

漳平縣在府西北三百二十里

國朝成化三年龍巖縣民林廷琥等以居仁聚賢感化和睦永福五里去縣遠而地險賦稅不供請別置一縣從之遂以七年勅治所于九龍溪之北此五都者居漳上流千山之中而治所在其平行故名之曰漳平嘉靖十四年析聚賢里九圍置大田縣屬延平府○龍亭山在縣西里許山半清泉一泓可以溉田其巔容二百餘人遠眺則象山皆在目中縣治辰馬○高巖山在縣北上有大小二石洞澗水所出○龍門洞在縣東感化里有石室冬溫夏涼中有磐石可坐百餘人又有蝙蝠洞在秋竹坂之陽峭壁巉巖洞穴深邃寒泉清冽行爲長流相傳有竅通尤溪縣或秉炬深入不能窮其底○畚洞在縣南永福里磐踞龍巖安溪龍溪南靖漳平五縣之間而漳平正當其北為要衝萬山環抱四面阻塞洞口險隘僅通人行其中寬廣可容百家畚田播種足以自給○螺井在高明坑相傳穴中有螺大如斗隱見莫測時起雲霧○鰲池在聚賢里周圍千頃大澇不溢大旱不涸池東有祠朔望則群魚浮列池上朝向○三溪林一名白

鶴湖在縣南三十里山巔峻絕湧泉成湖瀑布而下為第二宮第三宮尋龍禱雨者攀躋可到第二宮雲霧油然入者淒冷時有白鶴飛昇故名○三清湖一名魚龍津在縣北和睦里自高山發源湧為石湖瀑布而下聯疊三潭相傳有龍蹤仙跡其地有山九峰疊聳名九仙山石窟深險號仙人插劍處

平和縣

在府西南二百五里

正德間象湖賊起巡撫都御史王守仁發二省兵勦平之于是上言河頭之地北與蘆溪流思山岡

接境西北與漳平象湖山接境而平和等鄉又與廣東饒平縣大傘箭灌等鄉接境皆窮險賊巢與所屬縣治相距五日程往往相誘出劫宜設縣控制遂割南靖之新安清寧等里漳浦之二三等都置縣以其鄉名為名○志云縣之名勝有三平山巖谷深邃登者必歷三險三平乃至其上故名山有龜蛇峰和尚潭九層巖雙髻山高柯嶺煎茶塢虎爬泉錫杖樹大伯山唐天寶初義中禪師自紫芝山移錫于此山九層巖有鬼穴象鬼昇師投入深潭及還宴坐如故復昇至瑞龍百丈漈絕石沈

之復如故由是乃伏乞為架院願慈悲閉目七日許之未逾五日師忽開目而院已成惟山門未就衆鬼逸去有大魅獨留隨侍身毛毯毳因名毛毯毳侍者學人不遠荒服咨請教法常有三百餘人是時王侍郎諷出守漳南來訪禪師因建有侍郎亭宋龍溪人吳翼嘗讀書于此一夕毛毯毳伸手于窓隙為戲翼因押花字于其手掌遂不能去平旦苦請翼拭其字乃得脫晚○大峰山在新安里邑之鎮山也高峻巉巖羈絡群岫崿起石峰十有七自山麓至巔可五十餘里中多巨靈斧跡又多巨石巖洞窈窕儼若化人之居有青雲峰形若獅子口攀緣丈許方得入中可坐三十餘人漳浦志載陳元光改葬其父于大峰山即此又有楓山青雲獅子佛祖諸巖山北有靈通巖巨石為蓋泉涓滴其上如雲如霧如珠簾四時不竭有風洞風出色如綠霧劈立半山非架梯不能到是山泉潢四注畫地成川自正西出者其下為麤溪又西過樓宅逕縣治曰河頭溪合蘆溪達海其東北出者下為高山溪入溪口溪至郡城其東南出者曰河上溪至西林溪又南流為雲霄溪下漳江入海其正南

出者曰徐坑溪過詔安為東溪入海

詔安縣在府治南
二百里

漳浦極南之地有南詔者山環九侯赤坑水匯象溪大海南詔之名未詳何始或云其風景類滇南故襲其名宋為南詔場置西尉主之我嘉靖九年析漳浦縣之三四五都為縣名曰詔安蓋取南詔安靖之義○按赤坑山在縣西三十里勢若五星錯落轉而鳳嶺至于良峰距縣西一里為縣之主山○九侯山在縣北二十五里九峰並列故以侯名有石門可通車馬頂上谷數十人中有風動石

天然橋飛來佛羅漢洞諸勝圖經云夏禹庶子封于會稽其後子孫九人入閩沒而為神各主一山按史記本文少康庶子封于會稽廿世至勾踐又六世至無疆為楚所滅子孫散處海上今詔安龍巖各有九侯山九侯巖或當時所居宋邑人沈子真以歲貢授揭陽縣丞不就歸隱于此國祚淪亡作詩文效陶淵明但書甲子不用胡元年號又有陳植登淳祐四年進士帝昺航海植領海舟見事危斷維出港自以六舟泊梅嶺牧亡命馳檄諸蠻圖立宋後聞世傑覆舟遂變姓名隱焉臨終令葬

海濱望崖山而不面北○龜山在縣西南二十五里上有巨壑蛟龍潛焉有石洞可容數十人山右即汀漳分界○漸山在縣東五十里高峭千仞頂分三峰中有潭深不可測山岐跨至港口渡西南巨石若屋內有泉甚清冽正德十四年龍起其中聲如摧屋食頃方止山塌裂深廣丈餘宋翁待舉陳景肅楊仕訓兄弟皆居於山麓因築室讀書其上種榴數百株號石榴洞待舉政和二年進士知興化軍景肅紹興二十一年進士有文集二卷仕訓慶元二年進士事朱文公為弟子弟仕謹嘉定進士又紹興時有吳大成者當秦檜柄國歸隱于石榴洞云○川陵山在縣東界濱海相傳帝昺南渡將都南澳築此為東京地遂陷入于海今城堞尚存自山巔向海莫窮其際海中猶有木頭竹叢潮退風靜鄉人駕舟取以為薪與之鄰者有甘山南面海中遠視若有一小髻天將颶風驟雨其狀變幻若屏若屋若獅象四面皆海中有一井其水獨甘○石塏溪杜氏通典載漳浦郡西北至石塏溪一百五十里淳祐志云石塏渡有靈著王故壘及磨劔石唐杜岐公作通典載臨漳石塏渡是時

去垂拱未遠必有所考正德志漳浦縣下云石塏溪在西南界盡處又引舊志以為在江西閩廣之交本名石塏訛為石神涉其流者兩足皆黑謂之烏脚瘴今按漳浦西北大峰山之東有高坑石塏前亦有渡鄉人呼為石神其大峰山又有別流下詔安東溪入海者是漳浦西南非西北其靈著王磨劔石在雲霄六郡豈石塏亦別有是石耶沈存中筆談載漳州界有烏脚溪涉者足皆如墨飲之則病瘴行人皆載水自隨梅龍圖素多病預憂瘴癘至烏脚溪使數人員荷以物蒙身恐為瘴水所霑兢揚過甚忽墜水中自謂必死然自此宿病盡除無復昔之羸瘵人皆以為異云

海澄縣

在府東南五十里

龍溪縣八九都濱海之地有月港正德間土民多航海貿易于諸番嘉靖九年置安邊館于此歲遣通判駐守三十年建靖海館以通判往來巡緝四十三年始置縣○儒山在縣西南二里許俗名蔡前山圓秀特起其北為縣治距縣六七里其遠擁儼如冠裳者曰席帽山又西而林麓葱蒨頰南溪如帶者曰常春山又東為鴻山稍北為鹿石山○

南溪之陽有山焉海水逆潮江水倒流其相合處
為南岐鋪頭山亦名倒港山○縣東南山之峻者
曰文蓋山有石室可容數百人雲氣常覆其上逾
江北望者曰文圃山本為青礁之境唐謝脩洪文
用石蕢三人皆以詞藻著名而居于此自廣明西
幸遯跡不出耻于事虜及光啟迴鑿脩乃出登進
士五季分崩文用終不為時屈蕢以世胄薄游鯁
論忤時浩然而歸後人因其所居之山名為文圃
與同安縣共界宋蘇竦顏慥之徒俱隱焉

寧洋縣在府北
四百里

龍巖之東北境有集賢里東西洋者界于漳平永
安大田連城四縣之間其地谿峒深邃鳥道險峻
經二百餘年鞠為寇穴至正統間亂無寧歲乃置
巡檢司以控制之亂如故嘉靖四十一年饒寇掠
境土寇乘之其首則廖選蘇阿普輩相煽而起漳
平知縣魏文瑞進討死焉于是諸生曹文燁鳴鳳
等請設縣報可至隆慶元年始析龍巖縣集賢里
五圖延平府大田永安二縣各二圖設為縣而以
寧洋名○香寮山在縣城南上有紫雲洞可容數
萬人絕頂有天臺臺有龍潭石窟如釜(明劉銳詩)

石磬一聲天地曉白雲捲地鶴歸來即此又有天
柱山山中之石或方或圓如人雕琢極其工巧○
縣東有龜嶺鴻岐果老諸山俱在鎮海衛城南望
大海汪洋無際○陸鰲所自漳浦鐵竈坑南行三
十餘里平沙漠漠三面皆海惟正北陸行所城如
巨鰲戴山舊名青山亦曰鰲山山腰人家鱗宋相
疊雖雨夜海中常見燈火城中有古樓山城東有
風動石人卧其下伸足則石動而左縮則返而右
其川為南北西三溪合流而遶縣郭激盪生濤稱
東西洋以此

卷之二